

NAPOMENE UZ DRUGO IZDANJE

Od objavljivanja prvog izdanja ovog udžbenika 2005. godine izvršene su određene izmjene u materiji posebnog dijela krivičnog prava. Među značajnije promjene svakako spadaju one izmjene koje su sadržane u Zakonu o izmjenama Krivičnog zakona Republike Srpske ("Sl. glasnik RS", br.37/06) kojima je ukinuta gl. XXVI, odnosno krivična djela protiv vojske Republike Srpske, a što je uslijedilo nakon izvršene reforme u segmentu oružanih snaga u Bosni i Hercegovini. Pored toga, Zakonom o dopuni Krivičnog zakona Republike Srpske ("Sl. glasnik RS", br. 70/06), a u cilju uspješnijeg suzbijanja organizovanog kriminala, u grupu krivičnih djela protiv javnog reda i mira (gl. XXX) uvedeno je posebno krivično djelo tzv. "organizovani kriminal" (čl. 383a), kao posebni (zbirni) teži oblik svih krivičnih djela, odnosno djela sa kaznom zatvora od tri godine ili težom kaznom, kojom je predviđeno posebno kažnjavanje u slučajevima izvršenja krivičnih djela u okviru zločinačkog udruženja (čl. 137. st. 13.). Ova odredba je identična sa odredbom iz čl. 250. KZ BiH.

U međuvremenu mijenjale su se i odredbe u posebnom dijelu Krivičnog zakona Bosne i Hercegovine. Izostavljanjem krivičnih djela protiv oružanih snaga u entitetskim krivičnim zakonima, regulativa ovih krivičnih djela prenesena je u nadležnost Bosne i Hercegovine. Zakonom o izmjenama i dopunama Krivičnog zakona Bosne i Hercegovine – ZID KZBiH ("Sl. glasnik BiH", br. 53/06) uvedena je posebna zakonska glava u KZ BiH (gl. XXI A) u kojoj su, sa određenim izmjenama, regulisana ova krivična djela. Istim zakonom su učinjene i izmjene u nekim drugim zakonskim glavama, kao što je npr. uvođenje posebnog krivičnog djela "Protivzakonito formiranje vojnih snaga" iz čl. 162a, te izmjene kod krivičnog djela špijunaže, oba u grupi krivičnih djela protiv integriteta BiH. Značajne izmjene su uvedene i ZID KZBiH ("Sl. glasnik BiH", br. 55/06) u vezi sa zabranjenom upotrebom i prometom hemijskog i biološkog oružja u čl. 193.a, 193.b i 193.c (Zakon o implementaciji Konvencije o zabrani razvijanja, proizvodnje, gomilanja i korištenja hemijskog oružja i o njegovom uništavanju – Zakon o implementaciji CWC), te čl. 155.a kojim je u grupu krivičnih djela protiv slobode i prava čovjeka i građanina uvedeno novo krivično djelo "Davanje lažnih izjava tokom postupka imenovanja". Posebno krivično djelo "neprijavljivanje masovne grobnice" uvedeno je u grupu krivičnih djela protiv pravosuđa čl. 231a (Zakon o dopuni KZ BiH, "Sl. glasnik BiH", br.30 /05).

Najzad, treba napomenuti da su kod izlaganja krivičnog djela zloupotrebe službenog položaja ili ovlaštenja iz čl. 347. KZRS u tekstu učinjene određene inovacije i izmjene, s obzirom da su se u prethodnom izdanju udžbenika potkrali određeni propusti koji su nastali kompjuterskim prenošenjem teksta iz komentara KZ BiH u kojem je ovo djelo regulisano nešto drugačije, što imaoci prvog izdanja udžbenika trebaju imati na umu kada je u pitanju ovo krivično djelo.

Autori